

(षष्ठोऽध्यायः ॥ वर्गाः 1-25)

(6)

81

(म.7, अनु.5)

ऋषिः वसिष्ठः मैत्रावरुणिः	छन्दः बृहती 1,3,5, सतोबृहती 2,4,6	देवता उषाः
---------------------------	-----------------------------------	------------

प्रत्यु अदर्श्यायत्युश्च्छन्तीं दुहिता दिवः	
अपो महि व्ययति चक्षसे तमो ज्योतिष्कृणोति सूनरीं	॥ 1 ॥
उदुस्त्रियाः सृजते सूर्यः सचाँ उद्यन्नक्षत्रमर्चिवत्	
तवेदुषो व्युषि सूर्यस्य च सं भुक्तेन गमेमहि	॥ 2 ॥
प्रति त्वा दुहितर्दिव उषो जीरा अभुत्स्महि	
या वहसि पुरु स्पार्ह वनन्वति रत्नं न दाशुषे मयः	॥ 3 ॥
उच्छन्ती या कृणोषि मंहना महि प्रख्यै देवि स्वर्दृशे	
तस्यास्ते रत्नभाज ईमहे वयं स्याम मातुर्न सूनवः	॥ 4 ॥
तच्चित्रं राध आ भरोषो यदीर्घश्रुत्तमम्	
यत्ते दिवो दुहितर्मर्तभोजनं तद्रास्व भुनजामहै	॥ 5 ॥
श्रवः सूरिभ्याँ अमृतं वसुत्वनं वाजाँ अस्मभ्यं गोमतः	
चोदयित्री मघोनः सूनृतावत्युषा उच्छदपु सिधः	॥ 6 ॥

(10)

82

(म.7, अनु.5)

ऋषिः वसिष्ठः मैत्रावरुणिः	छन्दः जगती	देवता इन्द्रावरुणौ
---------------------------	------------	--------------------

इन्द्रावरुणा युवमध्वराय नो विशे जनाय महि शर्म यच्छतम्	
दीर्घप्रयज्युमति यो वनुष्यति वयं जयेम पृत्नासु दूढ्यः	॥ 1 ॥
सम्राळन्यः स्वराळन्य उच्यते वां महान्ताविन्द्रावरुणा महावसू	
विश्वे देवासः परमे व्योमनि सं वामोजो वृषणा सं बलं दधुः	॥ 2 ॥
अन्वपां खान्यतृन्तमोजसा सूर्यमैरयतं दिवि प्रभुम्	
इन्द्रावरुणा मदेँ अस्य मायिनोऽपिन्वतमपितुः पिन्वतं धियः	॥ 3 ॥
युवामिद्युत्सु पृत्नासु वह्नयो युवां क्षेमस्य प्रसवे मितज्ञवः	
ईशाना वस्व उभयस्य कारव इन्द्रावरुणा सुहवा हवामहे	॥ 4 ॥
इन्द्रावरुणा यदिमानि चक्रथुर्विश्वा जातानि भुवनस्य मज्मना	
क्षेमैण मित्रो वरुणं दुवस्यति मरुद्भिरुग्रः शुभमन्य ईयते	॥ 5 ॥
महे शुल्काय वरुणस्य नु त्विष ओजो मिमाते ध्रुवमस्य यत्स्वम्	
अजामिमन्यः श्रथयन्तमातिरद्भ्रेभिरन्यः प्र वृणोति भूयसः	॥ 6 ॥
न तमंहो न दुरितानि मर्त्यमिन्द्रावरुणा न तपः कुतश्चन	
यस्य देवा गच्छथो वीथो अध्वरं न तं मर्तस्य नशते परिहृतिः	॥ 7 ॥
अर्वाङ्ग्रा दैव्येनावसा गतं शृणुतं हवं यदि मे जुजोषथः	
युवोर्हि सख्यमुत वा यदाप्यं मार्डीकमिन्द्रावरुणा नि यच्छतम्	॥ 8 ॥

अस्मार्कमिन्द्रावरुणा भरैभरे पुरोयोधा भवतं कृष्ट्योजसा |
यद्वां हवन्त उभये अर्धं स्पृधि नरस्तोकस्य तनयस्य सातिषु || 9 ||
अस्मे इन्द्रो वरुणो मित्रो अर्यमा द्युमं यच्छन्तु महि शर्म सप्रथः |
अवृधं ज्योतिरदितेऋतावृधो देवस्य श्लोकं सवितुर्मनामहे || 10 ||

(10)

83

(म.7, अनु.5)

ऋषिः वसिष्ठः मैत्रावरुणिः	छन्दः जगती	देवता इन्द्रावरुणौ
युवां नरा पश्यमानासु आप्यं प्राचा गव्यन्तः पृथुपर्शवो ययुः		
दासां च वृत्रा हतमार्याणि च सुदासमिन्द्रावरुणावसावतम् 1		
यत्रा नरः समर्यन्ते कृतध्वजो यस्मिन्नाजा भवति किं च न प्रियम्		
यत्रा भयन्ते भुवना स्वर्दृशस्तत्रा न इन्द्रावरुणार्धि वोचतम् 2		
सं भूम्या अन्ता ध्वसिरा अदृक्षतेन्द्रावरुणा दिवि घोष आरुहत्		
अस्थुर्जनानामुप मामरातयोऽर्वागवसा हवनश्रुता गतम् 3		
इन्द्रावरुणा वधनाभिरप्रति भेदं वन्वन्ता प्र सुदासमावतम्		
ब्रह्माण्येषां शृणुतं हवीमनि सत्या तृत्सूनामभवत्पुरोहितः 4		
इन्द्रावरुणावभ्या तपन्ति माघान्युर्यो वनुषामरातयः		
युवं हि वस्व उभयस्य राजथोऽर्धं स्मा नोऽवतं पार्ये दिवि 5		
युवां हवन्त उभयास आजिष्विन्द्रं च वस्वो वरुणं च सातये		
यत्र राजभिर्दशभिर्निबाधितं प्र सुदासमावतं तृत्सुभिः सह 6		
दश राजानः समिता अयज्यवः सुदासमिन्द्रावरुणा न युयुधुः		
सत्या नृणामन्त्रसदामुपस्तुतिर्देवा एषामभवन्देवहृतिषु 7		
दाशराज्ञे परियत्ताय विश्वतः सुदास इन्द्रावरुणावशिक्षतम्		
श्वित्यञ्चो यत्र नमसा कपर्दिनो धिया धीवन्तो असपन्तु तृत्सवः 8		
वृत्राण्यन्यः समिथेषु जिघ्रते व्रतान्यन्यो अभि रक्षते सदा		
हवामहे वां वृषणा सुवृक्तिभिरस्मे इन्द्रावरुणा शर्म यच्छतम् 9		
अस्मे इन्द्रो वरुणो मित्रो अर्यमा द्युमं यच्छन्तु महि शर्म सप्रथः		
अवृधं ज्योतिरदितेऋतावृधो देवस्य श्लोकं सवितुर्मनामहे 10		

(5)

84

(म.7, अनु.5)

ऋषिः वसिष्ठः मैत्रावरुणिः	छन्दः त्रिष्टुप्	देवता इन्द्रावरुणौ
आ वां राजानावध्वरे ववृत्यां हव्येभिरिन्द्रावरुणा नमोभिः		
प्र वां घृताचीं बाह्वोर्दधाना परि त्मना विषुरूपा जिगाति 1		
युवो राष्ट्रं बृहदिन्वति द्यौर्यो सेतृभिररज्जुभिः सिनीथः		
परि नो हेळो वरुणस्य वृज्या उरुं न इन्द्रः कृणवदु लोकम् 2		

कृतं नो यज्ञं विदथेषु चारुं कृतं ब्रह्माणि सूरिषु प्रशस्ता |
 उपो रयिर्देवजूतो न एतु प्र णः स्पार्हाभिरूतिभिस्तिरेतम् || 3 ||
 अस्मे इन्द्रावरुणा विश्ववारं रयिं धत्तं वसुमन्तं पुरुक्षुम् |
 प्र य आदित्यो अनृता मिनात्यमिता शूरो दयते वसूनि || 4 ||
 इयमिन्द्रं वरुणमष्ट मे गीः प्रावत्तोके तनये तूतुजाना |
 सुरत्नासो देववीतिं गमेम यूयं पात स्वस्तिभिः सदा नः || 5 ||

(5)

85

(म.7, अनु.5)

ऋषिः वसिष्ठः मैत्रावरुणिः	छन्दः त्रिष्टुप्	देवता इन्द्रावरुणौ
---------------------------	------------------	--------------------

पुनीषे वामरक्षसं मनीषां सोममिन्द्राय वरुणाय जुह्वत् |
 घृतप्रतीकामुषसं न देवीं ता नो यामत्रुरुष्यतामभीकै || 1 ||
 स्पर्धन्ते वा उ देवहूये अत्र येषु ध्वजेषु दिद्यवः पतन्ति |
 युवं तां इन्द्रावरुणावमित्रान्हतं पराचः शर्वा विषूचः || 2 ||
 आपश्चिद्धि स्वयंशसः सदाःसु देवीरिन्द्रं वरुणं देवता धुः |
 कृष्टीरन्यो धारयति प्रविक्ता वृत्राण्यन्यो अप्रतीनि हन्ति || 3 ||
 स सुक्रतुर्ऋतचिदस्तु होता य आदित्य शर्वसा वां नमस्वान् |
 आववर्तदवसे वां हविष्मानसदित्स सुविताय प्रयस्वान् || 4 ||
 इयमिन्द्रं वरुणमष्ट मे गीः प्रावत्तोके तनये तूतुजाना |
 सुरत्नासो देववीतिं गमेम यूयं पात स्वस्तिभिः सदा नः || 5 ||

(8)

86

(म.7, अनु.5)

ऋषिः वसिष्ठः मैत्रावरुणिः	छन्दः त्रिष्टुप्	देवता वरुणः
---------------------------	------------------	-------------

धीरा त्वस्य महिना जूनूषि वि यस्तस्तम्भु रोदसी चिदुर्वी |
 प्र नाकमृष्वं नुनुदे बृहन्तं द्विता नक्षत्रं पप्रथञ्च भूम || 1 ||
 उत स्वयां तन्वाꣳ सं वदे तत्कदा न्वश्न्तर्वरुणे भुवानि |
 किं मै हव्यमहणानो जुषेत कदा मृळीकं सुमना अभि ख्यम् || 2 ||
 पृच्छे तदेनो वरुण दिदक्षूपो एमि चिकितुषो विपृच्छम् |
 समानमिन्मै क्वयश्चिदाहुरयं ह तुभ्यं वरुणो हणीते || 3 ||
 किमागं आस वरुण ज्येष्ठं यत्स्तोतारं जिघांससि सखायम् |
 प्र तन्मै वोचो दूळभ स्वधावोऽव त्वानेना नमसा तुर इयाम् || 4 ||
 अव द्रुग्धानि पित्र्यां सृजा नोऽव या वयं चकृमा तनूभिः |
 अव राजन्यशुतृपं न तायुं सृजा वत्सं न दाम्नो वसिष्ठम् || 5 ||
 न स स्वो दक्षो वरुण धृतिः सा सुरा मन्युर्विभीदको अर्चितः |
 अस्ति ज्यायान्कनीयस उपारे स्वप्नश्चनेदनृतस्य प्रयोता || 6 ||

अरं दासो न मीळ्हुषे करण्यहं देवाय भूर्णयेऽनागाः |
 अचैतयदचितो देवो अर्यो गृत्सं राये कवितरो जुनाति || 7 ||
 अयं सु तुभ्यं वरुण स्वधावो हृदि स्तोम उपश्रितश्चिदस्तु |
 शं नः क्षेमे शमु योगे नो अस्तु यूयं पात स्वस्तिभिः सदा नः || 8 ||

(7)

87

(म.7, अनु.5)

ऋषिः वसिष्ठः मैत्रावरुणिः

छन्दः त्रिष्टुप्

देवता वरुणः

रदत्पथो वरुणः सूर्याय प्राणांसि समुद्रिया नदीनाम् |
 सर्गो न सृष्टो अर्वीतीर्ऋतायञ्चकार महीरवनीरहंभ्यः || 1 ||
 आत्मा ते वातो रज आ नवीनोत्पशुर्न भूर्णिर्यवसे ससवान् |
 अन्तर्मही बृहती रोदसीमे विश्वा ते धाम वरुण प्रियाणि || 2 ||
 परि स्पशो वरुणस्य स्मदिष्टा उभे पश्यन्ति रोदसी सुमेके |
 ऋतावानः कवयो यज्ञधीराः प्रचेतसो य इषयन्त मन्म || 3 ||
 उवाच मे वरुणो मेधिराय त्रिः सप्त नामाघ्या बिभर्ति |
 विद्वान्पदस्य गुह्या न वोचद्युगाय विप्र उपराय शिक्षन् || 4 ||
 तिस्रो द्यावो निहिता अन्तरस्मिन्तिस्रो भूमिरुपराः षड्विधानाः |
 गृत्सो राजा वरुणश्चक्र एतं दिवि प्रेङ्खं हिरण्ययं शुभे कम् || 5 ||
 अव सिन्धुं वरुणो द्यौरिव स्थादद्रप्सो न श्वेतो मृगस्तुविष्मान् |
 गम्भीरशंसो रजसो विमानः सुपारक्षत्रः सतो अस्य राजा || 6 ||
 यो मृळ्याति चक्रुषे चिदागो वयं स्याम वरुणे अनागाः |
 अनु व्रतान्यदितेर्ऋधन्तो यूयं पात स्वस्तिभिः सदा नः || 7 ||

(7)

88

(म.7, अनु.5)

ऋषिः वसिष्ठः मैत्रावरुणिः

छन्दः त्रिष्टुप्

देवता वरुणः

प्र शुन्ध्युवं वरुणाय प्रेष्ठां मतिं वसिष्ठ मीळ्हुषे भरस्व |
 य ईमर्वाञ्च करते यजत्रं सहस्रामघं वृषणं बृहन्तम् || 1 ||
 अधा न्वस्य संदृशं जगन्वान्प्रेरनीकं वरुणस्य मंसि |
 स्वर्श्यदश्मन्नधिपा उ अन्धोऽभि मा वपुर्दृशये निनीयात् || 2 ||
 आ यद्गहाव वरुणश्च नावं प्र यत्समुद्रमीरयाव मध्यम् |
 अधि यदपां स्नुभिश्चराव प्र प्रेङ्ख ईङ्ख्यावहै शुभे कम् || 3 ||
 वसिष्ठं ह वरुणो नाव्याधादृषिं चकार स्वपा महोभिः |

स्तोतारं विप्रः सुदिनत्वे अह्नां यान्नु द्यार्वस्तुतन्यादुषासः	॥ 4 ॥
क्वत् त्यानि नौ सख्या बभूवुः सचावहे यदवृकं पुरा चित्	
बृहन्तं मानं वरुण स्वधावः सहस्रद्वारं जगमा गृहं तै	॥ 5 ॥
य आपिर्नित्यो वरुण प्रियः सन्त्वामागांसि कृणवत्सखा ते	
मा त एनस्वन्तो यक्षिन्भुजेम यन्धि ष्मा विप्रः स्तुवते वरूथम्	॥ 6 ॥
ध्रुवासु त्वासु क्षितिषु क्षियन्तो व्यस्मत्पाशं वरुणो मुमोचत्	
अवो वन्वाना अदितेरुपस्थाद्युयं पात स्वस्तिभिः सदा नः	॥ 7 ॥

(5)

89

(म.7, अनु.5)

ऋषिः वसिष्ठः मैत्रावरुणिः	छन्दः गायत्री 1-4, जगती 5	देवता वरुणः
---------------------------	---------------------------	-------------

मो षु वरुण मृन्मयं गृहं राजन्नहं गमम् । मृळा सुक्षत्र मृळय	॥ 1 ॥
यदेमि प्रस्फुरत्रिवृ दृतिर्न ध्मातो अद्रिवः । मृळा सुक्षत्र मृळय	॥ 2 ॥
क्रत्वः समह दीनता प्रतीपं जगमा शुचे । मृळा सुक्षत्र मृळय	॥ 3 ॥
अपां मध्ये तस्थिवांसं तृष्णाविदञ्जरितारम् । मृळा सुक्षत्र मृळय	॥ 4 ॥
यत्किं चेदं वरुण दैव्ये जनेऽभिद्रोहं मनुष्याश्चरामसि	
अचिन्ती यत्तव धर्मा युयोपिम मा नस्तस्मादेनसो देव रीरिषः	॥ 5 ॥

(7)

90

(म.7, अनु.6)

ऋषिः वसिष्ठः मैत्रावरुणिः	छन्दः त्रिष्टुप्	देवता वायुः 1-4, इन्द्रवायू 5-7
---------------------------	------------------	---------------------------------

प्र वीर्या शुचयो दद्विरे वामध्वर्युभिर्मधुमन्तः सुतासः	
वह वायो नियुतो याह्यच्छा पिबा सुतस्यान्धसो मदाय	॥ 1 ॥
ईशानाय प्रहृतिं यस्त आनट् शुचिं सोमं शुचिपास्तुभ्यं वायो	
कृणोषि तं मर्त्येषु प्रशस्तं जातोजातो जायते वाज्यस्य	॥ 2 ॥
राये नु यं जज्ञतू रोदसीमे राये देवी धिषणा धाति देवम्	
अध वायुं नियुतः सश्चत् स्वा उत श्वेतं वसुधितिं निरेके	॥ 3 ॥
उच्छन्नषसः सुदिना अरिप्रा उरु ज्योतिर्विविदुर्दीध्यानाः	
गव्यं चिदूर्वमुशिजो वि वन्न्रुस्तेषामनु प्रदिवः ससुरापः	॥ 4 ॥
ते सत्येन मनसा दीध्यानाः स्वेन युक्तासः क्रतुना वहन्ति	
इन्द्रवायू वीरवाहं रथं वामीशानयोर्भि पृक्षः सचन्ते	॥ 5 ॥
ईशानासो ये दधते स्वर्णो गोभिरश्वेभिर्वसुभिर्हिरण्यैः	
इन्द्रवायू सूरयो विश्वमायुरर्विद्विर्वीरैः पृतनासु सह्युः	॥ 6 ॥
अर्वन्तो न श्रवसो भिक्षमाणा इन्द्रवायू सुष्टुतिभिर्वसिष्ठाः	
वाज्यन्तः स्ववसे हुवेम यूयं पात स्वस्तिभिः सदा नः	॥ 7 ॥

(7)

91

(म.7, अनु.6)

ऋषिः वसिष्ठः मैत्रावरुणिः

छन्दः त्रिष्टुप्

देवता वायुः 1-3, इन्द्रवायू 4-7

कुविदुङ्ग नमसा ये वृधासः पुरा देवा अनवद्यास आसन्	
ते वायवे मनवे बाधितायावासयन्नुषसं सूर्येण	॥ 1 ॥
उशन्ता दूता न दभाय गोपा मासश्च पाथः शरदश्च पूर्वीः	
इन्द्रवायू सुष्टुतिर्वामियाना माड्डीकमीट्टे सुवितं च नव्यम्	॥ 2 ॥
पीवोअन्नो रयिवृधः सुमेधाः श्वेतः सिषक्ति नियुतामभिःश्रीः	
ते वायवे समनसो वि तस्थुर्विश्वेन्नरः स्वपत्यानि चक्रुः	॥ 3 ॥
यावत्तरस्तन्वोर् यावदोजो यावन्नरश्चक्षसा दीध्यानाः	
शुचिं सोमं शुचिपा पातमस्मे इन्द्रवायू सदतं बर्हिरेदम्	॥ 4 ॥
नियुवाना नियुतः स्पार्हवीरा इन्द्रवायू सुरथं यातमर्वाक्	
इदं हि वां प्रभृतं मध्वो अग्रमध प्रीणाना वि मुमुक्तमस्मे	॥ 5 ॥
या वां शतं नियुतो याः सहस्रमिन्द्रवायू विश्ववाराः सचन्ते	
आभिर्यातं सुविदत्राभिरर्वाक्पातं नरा प्रतिभृतस्य मध्वः	॥ 6 ॥
अर्वन्तो न श्रवसो भिक्षमाणा इन्द्रवायू सुष्टुतिभिर्वसिष्ठाः	
वाज्यन्तः स्ववसे हुवेम यूयं पात स्वस्तिभिः सदा नः	॥ 7 ॥

(5)

92

(म.7, अनु.6)

ऋषिः वसिष्ठः मैत्रावरुणिः

छन्दः त्रिष्टुप्

देवता वायुः 1,3,5, इन्द्रवायू 2,4

आ वायो भूष शुचिपा उप नः सहस्रं ते नियुतो विश्ववार	
उपो ते अन्धो मद्यमयामि यस्य देव दधिषे पूर्वपेयम्	॥ 1 ॥
प्र सोता जीरो अध्वरेष्वस्थात्सोममिन्द्राय वायवे पिबध्यै	
प्र यद्वां मध्वो अग्रियं भरन्त्यध्वर्यवो देव्यन्तः शचीभिः	॥ 2 ॥
प्र याभिर्यासिं दाश्वान्समच्छा नियुद्धिर्वायविष्टये दुरोणे	
नि नो रयिं सुभोजसं युवस्व नि वीरं गव्यमश्व्यं च राधः	॥ 3 ॥
ये वायव इन्द्रमादनास आदेवासो नितोशानासो अर्यः	
घन्तो वृत्राणि सूरिभिः घ्याम सासुह्रांसो युधा नृभिरमित्रान्	॥ 4 ॥
आ नो नियुद्धिः शतिनीभिरध्वरं सहस्रिणीभिरुप याहि यज्ञम्	
वायो अस्मिन्सर्वने मादयस्व यूयं पात स्वस्तिभिः सदा नः	॥ 5 ॥

ऋषिः वसिष्ठः मैत्रावरुणिः

छन्दः त्रिष्टुप्

देवता इन्द्राग्नी

शुचिं नु स्तोमं नवजातमद्येन्द्राग्नी वृत्रहणा जुषेथाम्		
उभा हि वां सुहवा जोहवीमि ता वाजं सद्य उशते धेष्ठा	1	
ता सान्सी शवसाना हि भूतं साकंवृधा शवसा शूशुवांसा		
क्षयन्तौ रायो यवसस्य भूरैः पृङ्गं वाजस्य स्थविरस्य घृष्वैः	2	
उपो ह यद्विदथं वाजिनो गुर्धीभिर्विप्राः प्रमतिमिच्छमानाः		
अर्वन्तो न काष्ठां नक्षमाणा इन्द्राग्नी जोहुवतो नरस्ते	3	
गीर्भिर्विप्रः प्रमतिमिच्छमान इद्वै रयिं यशसं पूर्वभाजम्		
इन्द्राग्नी वृत्रहणा सुवज्रा प्र नो नव्यैभिस्तिरतं देष्णैः	4	
सं यन्मही मिथती स्पर्धमाने तनुरुचा शूरसाता यतैते		
अदेवयुं विदथे देवयुभिः सत्रा हतं सोमसुता जनैन	5	
इमामु षु सोमसुतिमुप न एन्द्राग्नी सौमनसाय यातम्		
नू चिद्धि परिमुम्राथे अस्माना वां शश्वद्विर्ववृतीयु वाजैः	6	
सो अग्र एना नमसा समिद्धोऽच्छा मित्रं वरुणमिन्द्रं वोचेः		
यत्सीमार्गश्चकृमा तत्सु मृळ तदर्यमादितिः शिश्रथन्तु	7	
एता अग्र आशुषाणास इष्टीर्युवोः सचाभ्यश्याम् वाजान्		
मेन्द्रो नो विष्णुर्मरुतः परि ख्यन्युयं पात स्वस्तिभिः सदा नः	8	

ऋषिः वसिष्ठः मैत्रावरुणिः

छन्दः गायत्री 1-11, अनुष्टुप् 12

देवता इन्द्राग्नी

इयं वामस्य मन्मन् इन्द्राग्नी पूर्वस्तुतिः	अ॒भ्राह्मि॒ष्टि॒रि॒वाजनि	1
शृणुतं जरितुर्हवमिन्द्राग्नी वनतं गिरः	ई॒शाना पि॒प्यतं धि॒र्यः	2
मा पापत्वार्य नो नरेन्द्राग्नी माभिशास्तये	मा नो री॒रध॒तं नि॒दे	3
इन्द्रे अग्रा नमो बृहत्सुवृक्तिमेरयामहे	धि॒या धे॒ना अ॒व॒स्य॒वः	4
ता हि शश्वन्तु ईळत इत्था विप्रास उतये	स॒बा॒धो वा॒जसा॒तये	5
ता वां गीर्भिर्विपुन्यवः प्रयस्वन्तो हवामहे	मे॒धसा॒ता स॒नि॒ष्य॒वः	6
इन्द्राग्नी अवसा गतमस्मभ्यं चर्षणीसहा	मा नो दुःशंसं ईशत	7
मा कस्य नो अररुषो धूर्तिः प्रणङ्गर्त्यस्य	इन्द्राग्नी शर्म यच्छतम्	8
गोमद्विरण्यवद्वसु यद्वामश्वावदीमहे	इन्द्राग्नी तद्वनेमहि	9
यत्सोम आ सुते नर इन्द्राग्नी अजोहवुः	स॒मी॒वन्ता स॒पर्य॒वः	10
उक्थेभिर्वृत्रहन्तमा या मन्दाना चिदा गिरा	आ॒ङ्ग॒षै॒रा॒वि॒वा॒सतः	11
ताविदुःशंसं मर्त्यं दुर्विद्वांसं रक्षस्विनम्	आ॒भो॒गं ह॒न्म॒ना ह॒तमु॒दधिं ह॒न्म॒ना ह॒तम्	12

(6)

95

(म.7, अनु.6)

ऋषिः वसिष्ठः मैत्रावरुणिः छन्दः त्रिष्टुप् 1-2, बृहती 3-6 देवता सरस्वती 1-2,4-6, सरस्वान् 3

प्र क्षोदसा धार्यसा सस्र एषा सरस्वती धरुणमार्यसी पूः	
प्रबार्बधाना रथ्येव याति विश्वा अपो महिना सिन्धुरन्याः	॥ 1 ॥
एकाचेतत्सरस्वती नदीनां शुचिर्यती गिरिभ्य आ समुद्रात्	
रायश्चेतन्ती भुवनस्य भूरैर्घृतं पयो दुदुहे नाहृषाय	॥ 2 ॥
स वावृधे नर्यो योषणासु वृषा शिशुर्वृषभो यज्ञियासु	
स वाजिनं मघवद्भ्यो दधाति वि सातये तन्वं मामृजीत	॥ 3 ॥
उत स्या नः सरस्वती जुषाणोप श्रवत्सुभगा यज्ञे अस्मिन्	
मित्तज्ञुभिर्नमस्यैरियाना राया युजा चिदुत्तरा सखिभ्यः	॥ 4 ॥
इमा जुह्वाना युष्मदा नमोभिः प्रति स्तोमं सरस्वति जुषस्व	
तव शर्मन्त्रियतमे दधाना उप स्थेयाम शरणं न वृक्षम्	॥ 5 ॥
अयमु ते सरस्वति वसिष्ठो द्वारावृतस्य सुभगे व्यावः	
वर्ध शुभ्रे स्तुवते रासि वाजान्युयं पात स्वस्तिभिः सदा नः	॥ 6 ॥

(6)

96

(म.7, अनु.6)

ऋषिः वसिष्ठः मैत्रावरुणिः छन्दः बृहती 1, सतोबृहती 2, प्रस्तारपङ्क्तिः 3, गायत्री 4-6
देवता सरस्वती 1-3, सरस्वान् 4-6

बृहदु गायिषे वचोऽसुर्या नदीनाम्	
सरस्वतीमिन्महया सुवृक्तिभिः स्तोमैर्वसिष्ठ रोदसी	॥ 1 ॥
उभे यत्ते महिना शुभ्रे अन्धसी अधिक्षियन्ति पूरवः	
सा नो बोध्यवित्री मरुत्सखा चोद राधो मघोनाम्	॥ 2 ॥
भद्रमिद्भद्रा कृणवत्सरस्वत्यकवारी चेतति वाजिनीवती	
गृणाना जमदग्निवत्स्तुवाना च वसिष्ठवत्	॥ 3 ॥
जनीयन्तो न्वग्रवः पुत्रीयन्तः सुदानवः सरस्वन्तं हवामहे	॥ 4 ॥
ये ते सरस्व ऊर्मयो मधुमन्तो घृतश्रुतः तेभिर्नोऽविता भव	॥ 5 ॥
पीपिवांसं सरस्वतः स्तनं यो विश्वदर्शतः भक्षीमहि प्रजामिषम्	॥ 6 ॥

(10)

97

(म.7, अनु.6)

ऋषिः वसिष्ठः मैत्रावरुणिः छन्दः त्रिष्टुप् देवता इन्द्रः 1, बृहस्पतिः 2,4-8, इन्द्राब्रह्मणस्पती 3,9,
इन्द्राबृहस्पती 10

यज्ञे दिवो नृषदने पृथिव्या नरो यत्र देव्यवो मरुन्ति	
इन्द्राय यत्र सर्वनानि सुन्वे गमन्मदाय प्रथमं वयश्च	॥ 1 ॥
आ दैव्या वृणीमहेऽवांसि बृहस्पतिर्नो मह आ संखायः	

यथा भवेम मीळहुषे अनागा यो नो दाता परावतः पितेव	॥ 2 ॥
तमु ज्येष्ठं नमसा हविर्भिः सुशेवं ब्रह्मणस्पतिं गृणीषे	
इन्द्रं श्लोको महि दैव्यः सिषक्तु यो ब्रह्मणो देवकृतस्य राजा	॥ 3 ॥
स आ नो योनिं सदतु प्रेष्ठो बृहस्पतिर्विश्ववारो यो अस्ति	
कामो रायः सुवीर्यस्य तं दात्पषन्नो अतिं सञ्चतो अरिष्टान्	॥ 4 ॥
तमा नो अर्कममृताय जुष्टमिमे धासुरमृतासः पुराजाः	
शुचिक्रन्दं यजतं पस्त्यानां बृहस्पतिमनुवाणं हुवेम	॥ 5 ॥
तं शग्मासो अरुषासो अश्वा बृहस्पतिं सहवाहो वहन्ति	
सहश्चिद्यस्य नीलवत्सुधस्थं नभो न रूपमरुषं वसानाः	॥ 6 ॥
स हि शुचिः शतपत्रः स शुन्ध्युर्हिरण्यवाशीरिषिरः स्वर्षाः	
बृहस्पतिः स स्वावेश ऋष्वः पुरु सखिभ्य आसुतिं करिष्ठः	॥ 7 ॥
देवी देवस्य रोदसी जनित्री बृहस्पतिं वावृधतुर्महित्वा	
दक्षाय्याय दक्षता सखायः करद्वह्मणे सुतरा सुगाधा	॥ 8 ॥
इयं वां ब्रह्मणस्पते सुवृक्तिर्ब्रह्मेन्द्राय वज्रिणो अकारि	
अविष्टं धियो जिगृतं पुरंधीर्जजस्तमर्यो वनुषामरातीः	॥ 9 ॥
बृहस्पते युवमिन्द्रश्च वस्वो दिव्यस्यैशाथे उत पार्थिवस्य	
धत्तं रयिं स्तुवते कीरये चिद्युयं पात स्वस्तिभिः सदा नः	॥ 10 ॥

(7)

98

(म.7, अनु.6)

ऋषिः वसिष्ठः मैत्रावरुणिः

छन्दः त्रिष्टुप्

देवता इन्द्रः 1-6, इन्द्राबृहस्पती 7

अध्वर्यवोऽरुणं दुग्धमंशुं जुहोतन वृषभाय क्षितीनाम्	
गौराद्वेदीयां अवपानमिन्द्रो विश्वाहेद्याति सुतसोममिच्छन्	॥ 1 ॥
यदधिषे प्रदिवि चार्वन्नं दिवेदिवे पीतिमिदस्य वक्षि	
उत हृदोत मनसा जुषाण उशन्निन्द्र प्रस्थितान्याहि सोमान्	॥ 2 ॥
जज्ञानः सोमं सहसे पपाथ प्र ते माता महिमानमुवाच	
एन्द्रं पप्राथोर्वन्तरिक्षं युधा देवेभ्यो वरिवश्चकथ	॥ 3 ॥
यद्योधया महतो मन्यमानान्त्साक्षाम् तान्बाहुभिः शाशदानान्	
यद्वा नृभिर्वृत इन्द्राभियुध्यास्तं त्वयाजिं सौश्रवसं जयेम	॥ 4 ॥
प्रेन्द्रस्य वोचं प्रथमा कृतानि प्र नूतना मघवा या चकार	
यदेददेवीरसहिष्ट माया अथाभवत्केवलः सोमो अस्य	॥ 5 ॥
तवेदं विश्वमभितः पश्व्यं यत्पश्यसि चक्षसा सूर्यस्य	
गवामसि गोपतिरेकं इन्द्र भक्षीमहि ते प्रयतस्य वस्वः	॥ 6 ॥
बृहस्पते युवमिन्द्रश्च वस्वो दिव्यस्यैशाथे उत पार्थिवस्य	
धत्तं रयिं स्तुवते कीरये चिद्युयं पात स्वस्तिभिः सदा नः	॥ 7 ॥

ऋषिः वसिष्ठः मैत्रावरुणिः

छन्दः त्रिष्टुप्

देवता विष्णुः 1-3,7, इन्द्राविष्णू 4-6

पुरो मात्रया तन्वा वृधान न ते महित्वमन्वश्रुवन्ति	
उभे ते विद्म रजसी पृथिव्या विष्णो देव त्वं परमस्य वित्से	॥ 1 ॥
न ते विष्णो जायमानो न जातो देव महिम्नः परमन्तमाप	
उदस्तभ्रा नाकमृष्वं बृहन्तं दाधर्थं प्राचीं ककुभं पृथिव्याः	॥ 2 ॥
इरावती धेनुमती हि भूतं सूयवसिनी मनुषे दशस्या	
व्यस्तभ्रा रोदसी विष्णवेते दाधर्थं पृथिवीमभितो मयूखैः	॥ 3 ॥
उरुं यज्ञाय चक्रथुरु लोकं जनयन्ता सूर्यमुषासमग्निम्	
दासस्य चिद्वृषशिप्रस्य माया जघ्नथुर्नरा पृतनाज्येषु	॥ 4 ॥
इन्द्राविष्णू दंहिताः शम्बरस्य नव पुरो नवतिं च श्रथिष्टम्	
शतं वर्चिनः सहस्रं च साकं हथो अप्रत्यसुरस्य वीरान्	॥ 5 ॥
इयं मनीषा बृहती बृहन्तोरुक्रमा तवसा वर्धयन्ती	
ररे वां स्तोमं विदथेषु विष्णो पिन्वतमिषो वृजनेष्विन्द्र	॥ 6 ॥
वषट् ते विष्णवास आ कृणोमि तन्मै जुषस्व शिपिविष्ट हव्यम्	
वर्धन्तु त्वा सुष्टुतयो गिरो मे यूयं पात स्वस्तिभिः सदा नः	॥ 7 ॥

ऋषिः वसिष्ठः मैत्रावरुणिः

छन्दः त्रिष्टुप्

देवता विष्णुः

नू मर्तो दयते सनिष्यन्थो विष्णाव उरुगायाय दाशत्	
प्र यः सूत्राचा मर्नसा यजात एतावन्तं नर्यमाविवासात्	॥ 1 ॥
त्वं विष्णो सुमतिं विश्वजन्यामप्रयुतामेवयावो मतिं दाः	
पर्चो यथा नः सुवितस्य भूरेश्वावतः पुरुश्चन्द्रस्य रायः	॥ 2 ॥
त्रिदेवः पृथिवीमेष एतां वि चक्रमे शतर्चसं महित्वा	
प्र विष्णुरस्तु त्वसुस्तवीयान्त्वेषं ह्यस्य स्थविरस्य नामं	॥ 3 ॥
वि चक्रमे पृथिवीमेष एतां क्षेत्राय विष्णुर्मनुषे दशस्यन्	
ध्रुवासो अस्य कीरयो जनास उरुक्षिति सुजनिमा चकार	॥ 4 ॥
प्र तत्ते अद्य शिपिविष्ट नामार्यः शंसामि व्युनानि विद्वान्	
तं त्वा गृणामि त्वसुमतव्यान्क्षयन्तमस्य रजसः पराके	॥ 5 ॥
किमित्तं विष्णो परिचक्ष्यं भूत्प्र यद्वक्षे शिपिविष्टो अस्मि	
मा वर्षो अस्मदपं गूह एतद्यदन्यरूपः समिथे बभूथ	॥ 6 ॥
वषट् ते विष्णवास आ कृणोमि तन्मै जुषस्व शिपिविष्ट हव्यम्	
वर्धन्तु त्वा सुष्टुतयो गिरो मे यूयं पात स्वस्तिभिः सदा नः	॥ 7 ॥

। इति पञ्चमाष्टके षष्ठोऽध्यायः समाप्तः ।

